

Gangj daengz neix, Yenling doeksaet hwnjdaej, naeuz: “Yiengh-lawz mbouj geiq ndaej, caen ndeilau ha! Gyoengqde naeuz, haemhde gyoengqde doengzcae laihlawh dawz huqgung, vihliux ancienz, gyoengqde youq ndaw canghaeux seiqhenz diemj lab. Hoeng, daengz byonghhwnz, gyoengqde faemxfwg dingqny miz vunz hemq hwnjdaej, yienzhaeuh ndaw canghaeux couh miz haujlai ngauez fangz mbin bae mbin dauq, gij hoenz gyoengqvunz deng hwk biu caez. Gyoengqvunz cingq vuengmuengz seiz, youq gwnz laeuz caengz daihngeih diuq roengz geij duzgvaig gyauej nyoengqnywtwyt nei, co yawj lumj vunz, hoeng de baez cienq laeng le, fajnaj couh bienqbaenz fajnaj duzfangz roxnaeuz duzgvaig, yawj hwnjbae ndeilau dangqmaz. Gyoengqvunz sijdonz luenhlablab, seizde dai gwnz laeuz caengz daihngeih mbin daej ci cieng ndeu, baek hauej bakaek boux vunz sijdonz ndeu bae, baek hauej seizde ci cieng saenzdwdwd, yawj hwnjbae miz rengz dangqmaz, boux vunz sijdonz ‘a’ sing ndeu, bak byoq lwed couh dai bae lo, vunzlai engqgya vueng lo. Seizde geij duzgvaig de couh swngzgei ndonj hauej gyang gyoengqvunz sijdonz bae, gaj geij boux vunz. Gyoengqvunz sijdonz youh lau youh vueng, rag mid okdaeuj luenh faenz luenh camz, mizmbangj gaj dai vunz swhgeij, mizmbangj vuengmuengz buet deuz, ciengzmienh luenhnyagnyag. Geij boux buet okbae couh buet daengz yaxmonz bauqanq, gou sikhaek daiq bingmax gvaqdaeuj. Hoeng daengz dieg neix seiz huqgung caez mbouj raen lo.”

Veiz Cungh naeuz: “Baenzneix cingq deng lo, gou mbouj saenq lajmbwn miz fangz miz gvaig, neix cij dwg gyoengqvunz guhcaeug guh aen bajheiq luq vunz ndwi. Cij aenvih



seizhaenx luenh lai, gyoengqcaeug cij ndaej caeg huqgung bae.”

Yenling rub le rub gij mumh, naeuz: “Couhsuenq dwg vunz guh, seizneix raeuz hix mbouj rox dwg gyoengqvunz lawz ha?” Veiz Cungh daiq Yenling daej daengz gyang ding cang haeux, gip hwnj ci cieng baek hauej bakaek boux sijdonz, youh heuh boux bing baihhenz aeu ci cieng bingzseiz hoenxcienqg daej, naeuz: “Yenling, mwngz roxnyinh song ci cieng neix miz maz mbouj doxdoengz?” Yenling yawj le naeuz: “Mbouj miz maz mbouj doengz ha!” Veiz Cungh naeuz: “Mwngz aeu fwngz gaem song ci cieng neix, yienzhaeuh yunghrengz doxdoengz bae saenq, yawj miz maz mbouj doxdoengz.” Yenling ciuq gij vah Veiz Cungh guh, miz di geizheih dahraix, naeuz: “Yunghrengz doxdoengz bae saenq, ci cieng gaj vunz sijdonz saenzdwdwd, ci cieng dawz bae hoenxcienqg mbouj saenz.” Veiz Cungh naeuz: “Neix couh deng lo.” “Neix youh gangjmingz maz?” Yenling engqgya moengjdoengj lo.

Veiz Cungh naemj yaep ndeu, naeuz: “Gou duenhdingh gyoengqvunz caeg huqgung dwg vunz heiqduenz.” Yenling miz di doeksaet, muengz

cam: “Vihmaz?” Veiz Cungh menhmenh gangj okdaeuj: “Sien gangj mbaw baengz yiengh lumj vunz caeuq daengloengz. Haemhhaenx, aen cang haeux neix seiqmienh diemj miz lab, yienzhaeuh byonghhwnz couh yawj-raen haujlai ngauez fangz mbin bae mbin dauq, neix gizsaed dwg baihrog congheug bouxcaeug saj heiqngaueznaeng cauh baenz.”

“Heiqngaueznaeng?” Yenling mbouj rox neix dwg maz. Veiz Cungh laebdaeb gangj: “Heiqngaueznaeng dwg aeu naeng roxnaeuz baengz raed bae yiengh bouxvunz, gij mae iq gyauej ndeu cin gij naeng roxnaeuz baengz, gyauej ndeu cug youq gij diuz faex iq. Biujyienh seiz, diemj lab ciuq gij naeng caeuq baengz, hawj gij ngauez ingj hwnj gwnz muqhau bae, vunz youq baihlaeng muqhau bae ning gij diuz faex iq caemhcai gangj vah, baenzneix bouxyawj naengh youq baihnaj muqhau, couh lumj gij ngauez rox gangj rox ning nei. Seizhaenx bouxcaeug haengdingh youq congheug sik aen congheug gaemxgienz hung ndeu, yienzhaeuh diemj daengloengz, youq henz daengloengz saj heiqngaueznaeng. Ndaw canghaeux seiqmienh cungj dwg saekhau, ndaw ding youh diemj miz lab, ronghsagsag,

ndigah vunz ndaw ding yawj mbouj raen baihrog miz vunz diemj daengloengz. Geij boux vunzcaeug youq congheug baihrog saj heiqngaueznaeng, couh cauh baenz ndaw ding miz haujlai ngauezfanz mbin bae mbin dauq. Rox saj heiqngaueznaeng, gojnwngz dwg vunz ndaw heiqduenz.”

Yenling roxnyinh Veiz Cungh gangj miz dauhleix, hoeng ndawsim youh mbouj miz geijlai daej, couh cam: “Baengh gij baengz yiengh lumj vunz caeuq daengloengz, couh duenhdingh dwg vunz heiqduenz guh?” Veiz Cungh naeuz: “Neix dangyienz mbouj gaeuq. Hoeng, vunz sijdonz deuz okdaeuj naeuz, haemhde youq gwnz laeuz diuq roengz geij duzgvaig, mbouj rox dwg vunz dwg fangz, aenvih baez cienq ndang naj de couh bienqbaenz yiengh wnq, neix gizsaed dwg cungj heiqfap bienq naj ndeu, cij aenvih vunz sijdonz Senhlozgoz mbouj raen gvaq, ndigah lau ndaej hoenz biu caez.”

“Bienqnaj, gou yawj heiq seiz raen gvaq, boux biujyenj baez cienq ndang naj de couh bienqbaenz yiengh naj wnq. Ciuq neix daej gangj, geij duzgvaig haenx gizsaed dwg vunz cang baenz, gyoengqcaeug cang guh duzgvaig bae hwk gyoengqvunz sijdonz, hix miz di dauhleix.” Yenling ngaekgyaeuj naeuz.

Veiz Cungh laebdaeb naeuz: “Neix dwg yienzyinh aen daihngeih. Daihsam, dai ci cieng haenx yawj ok. Vunz heiqduenz biujyienj doxhoenx seiz, ciengzseiz youq gwnz daiz saenq cieng, aenvih cieng hoenxcienq saenq mbouj ndaej baenzneix saenz, ndigah heiqduenz couh aeu cungj diet daegbied ndeu daej cauh cieng, hawj ci cieng youq gwnz fwngz aeu di rengz bae saenq couh saenzdikdik, cungj cieng neix, cij miz ndaw heiqduenz miz!” (caengz sat)

Gij Riuz Mbongjmbwt

屎壳郎的传说

□ Vangz Gozgvanh / 黄国观

Gaxgonq, gwnzbiengz bya heu raemx seuq, gve mak rang mbin, dwg aen suenva gyoengq bouxsien daej youz ndeu.

Vihliux fuengzre gyoengqvunz gwn gij gve mak daiq lai, Nyawhdae fat diuz minghlingh he—lajmbwn lwgminz, sam ngoenz gwn donq ndeu. Caemhcai baij boux hak mbongjmbwt roengz laj daej cien minghlingh.

Mbongjmbwt baez daih’ it roengz laj daej, maez gij gingjsaek gyaue-ndei lajmbwn, banhaemh yaek dauq gwnz mbwn seiz cij geiq ndaej dawz linghbaiz okdaeuj, ndwn youq gwnz fwj sing hung naeuz: “Nyawhdae miz lingh, lajmbwn lwgminz, ngoenz gwn sam donq, dai ngoenzneix hawj hengz.” Byawz rox, de simgaen lai, “sam ngoenz gwn donq” doeg baenz “ngoenz gwn sam donq”.

Buenq bi gvaqbae, Nyawhdae daiq bang bouxsien roengz laj daej youz, gij gingjsaek gaxgonq mbouj miz lo, gij rang gve mak hix mbouj miz lo, dauqfanj mup ndaej doenghgi heiq haue. Baez dajdingq, cij rox mbongjmbwt cien lingh loeng lo. Lajmbwn lwgminz vihliux guh daengz ngoenz gwn sam donq, gwn gij gve mak caez vanzlij mbouj gaeuq, gyoengqde nyaengqfoed dangqmaz, caiq bae gwn rum, vat roengz namh bae aeu lwgmaenz daej gwn. Baenzneix, lajmbwn lwgminz gwn lai okhaex hix lai, heiq haue loemh mbwn.

Gij saeh neix Nyawhdae roxnyinh mbouj dwg lwgminz guh loek, dwg mbongjmbwt roengzdaej mbouj guh hong gonq, yaek dauq cij cien lingh, gip ndaej cien loeng lo. Caemhcai gaenq cien lingh roengzbae caiq gaj couh mbouj ndei lo.



Bya loeg raemx saw gwnzmbwn lamz.

Dozswh

Ndigah, Nyawhdae lij dwg hawj lwgminz ngoenz gwn sam donq, fad mbongjmbwt roengz laj daej aeu namh moek haex, hawj gij gingjsaek caeuq hoengheiq fukdauq ndaej lumj doenghbaez nei cij ndaej dauq gwnz mbwn.

Daj mwhde hwnj, mbongjmbwt

hwnzngoenz moek haex mbouj ndaej dingz, itcig moek daengz seizneix. Byawz rox, lajmbwn lwgminz yied daej yied lai, baenzneix yawj hwnjdaej, mbongjmbwt moek haex mbouj ndaej caenh, de caiq hix mbouj ndaej dauq gwnzmbwn lo.